

I noho tumanako etahi o tatou, kia whakatakotoria te kohatu o te kakonga i te mutunga o te noho o Miss Emire Bulstrode hei upoko mo te kura.

Kei te paunga o nga ra o Hune ka rihaina a Miss Emily.

Mohemua e taea ana e te iwi Maori te koki mai o te £400 i enei mara e rua, kua hui tatou ki te whakatakoto i te kohatu o Hukarere whare-karakia, me te poroporoaki hoki ki enei wahine rangatira na raua nei i whakatupu nga tamariki wahine o te motu i roto i enei tau e 30 ka pabure ake nei. Kei te Mohiotia ra he wa mate tenei i te uaua o te kitea o te moni. He aha koa ra, me whakawhirinaki atu ki te Wahi Ngaro hei awhina mai i a tatou. He taonga hoki tenei kei te tapaea atu ki te Atua.

NGA WHAKATAETAE TENIHI.

Kaore ano kia roa nga tamariki Maori e tino ako ana i te purei tenihi, engari no te hui ki Whanganui, ka kitea te kaha o te tamariki Maori ki tenei mahi. He pai tonu nga purei i tera tau i Rotorua, engari kua neke noake te mohio o te tamariki Maori i tenei tau. Ka mutu tetahi o nga purei rangatira a te pakeha he tenihi. Ko te wawata noake a te hinengaro kia riro mai te tiamupiana o Nui Tirenē nei i tetahi o nga uri o te iwi Maori. Kia kaha tamariki ma!

E kua ana e 400 nga taitamariki taane, wahine, i hui ki Whanganui. Nui atu te mihi o nga pakeha ki te pai o te noho, me te pai hoki o nga whakahaere, a taua ropu taitamariki. Kore rawa i kitea nga mahi hianga, kaore he haurangi, kaore he turituri i roto i nga whare, i nga tiriti ranei o Whanganui. Ahakoa no nga iwi katoa o te motu te hunga i huihui mai, to ratau ahua ano he whanau kotahi. Koinei tonu tetahi o nga hua mui o nga takaro nei, ara ko te whakamohio i a tatou tamariki ki a ratau, ko te turaki i te waara e wehewehe nei i tera hapu, i tera hapu, ara ko te whakakotahi i te ropu taitamariki.

No te hui ki Whanganui ka whakawhanuitia te kaupapa o nga whakahaere. Hei nga awatea ko nga takaro, hei nga ahiahi, ko nga take munui a Te Ao Hou.

He waimarie to tenei Hui i te wateatanga o Hon. A. T. Ngata, Ta Maui Pomare, me Dr Te Rangihira hei whakahaere i nga take whanui mo te ora o te iwi Maori. Ko etahi o nga take i oti i te Hui kei te Mauria ki Ponoke, ki reira whakapa atu ai ki te Pirimia me ona hoa. Kua rite he komiti hei whakautuki i nga take o te Hui. Ehara tenei i te hui whakaputa hau noa, penei me te nuinga o a tatou hui Maori. Kaore ka whakatinamatia tena kaupapa korero, tena tumanako a te hinengaro taitamariki mara.

Kaati, tera ano e tae mai te ripoata a Apirana mo nga mahi o te Hui a nga taitamariki i hui nei ki Putiki, me nga motini i pahitia.